

Sabbato Sancto ad Matutinum
LAMENTATIO PRIMA TERTII DIEI

De Lamentatione Jeremiae Prophetae.

HETH.

Misericordiae Domini, quia non sumus consumpti;
quia non defecerunt miserationes ejus.

HETH.

Novi diluculo,
multa est fides tua.

HETH.

Pars mea Dominus, dixit anima mea;
propterea exspectabo eum.

TETH.

Bonus est Dominus sperantibus in eum,
animae quaerenti illum.

TETH.

Bonum est praestolari cum silentio
salutare Dei.

TETH.

Bonum est viro cum portaverit jugum
ab adolescentia sua.

JOD.

Sedebit solitarius, et tacebit,
quia levavit super se.

JOD.

Ponet in pulvere os suum,
si forte sit spes.

JOD.

Dabit percutienti se maxillam,
saturabitur opprobriis.

CAPH.

Quia non repellet
in sempiternum Dominus.

CAPH.

Quia si abjecit, et miserebitur,
secundum multitudinem misericordiarum suarum.

CAPH.

Non enim humiliavit ex corde suo,
et abjecit filios hominum.

(Elegia tertia, 22–33)

Jerusalem, Jerusalem, convertere ad Dominum Deum tuum.